

EDICTO:

Ao non se presentar reclamacións contra o acordo provisional do Pleno de data 21/12/2017 relativo á aprobación inicial da modificación da Ordenanza fiscal reguladora da taxa pola prestación do servizo público da rede xeral municipal de sumidoiros e saneamento, o acordo queda aprobado definitivamente, sendo o texto íntegro da ordenanza o que figura como anexo deste edicto.

Contra a súa aprobación definitiva cabe interpor o recurso contencioso-administrativo ante a Sala do Contencioso do Tribunal Superior de Xustiza de Galicia, con sede en A Coruña, no prazo de dous meses a partir do día seguinte ao da súa publicación no Boletín Oficial da Provincia de Ourense.

ANEXO:

ORDENANZA FISCAL REGULADORA DA TAXA DA REDE DE SUMIDOIROS E SANEAMENTO

ARTIGO 1.- FUNDAMENTO E NATUREZA

En uso das facultades concedidas polos artigos 133.2 e 142 da Constitución e polo artigo 106 da Lei 7/1985, do 2 de abril, reguladora das bases do réxime local, e de conformidade co disposto nos artigos 15 a 19 da Lei 39/1988, do 28 de decembro, reguladora das facendas locais, este concello establece a "taxa da rede de sumidoiros", que se rexerá pola presente ordenanza fiscal, atendendo as dúas normas ao previsto no artigo 58 da referida Lei 39/1988

ARTIGO 2.- FEITO IMPOÑIBLE

1.- Constitúe o feito imponible da taxa:

a) A actividade municipal, técnica e administrativa, tendente a verificar se se dan as condicións necesarias para autorizar a acometida á rede de sumidoiros municipal.

b) A prestación dos servizos de evacuación de excretas, augas pluviais, negras e residuais, a través da rede de sumidoiros municipal, e o seu tratamento para depuralas.

2.- Non estarán suxeitas á taxa os predios declarados ruinosos ou que teñan a condición de terreo edificable.

ARTIGO 3.- SUXEITO PASIVO

1.- Son suxeitos pasivos contribuíntes as persoas físicas ou xurídicas e as entidades a que se refire o artigo 33 da Lei xeral tributaria que sexan:

a) Cando se trate da concesión de licenza de acometida á rede, o propietario, usufrutuario ou titular do dominio útil do terreo.

b) No caso de prestación de servizos do número 1.b) do artigo anterior, os ocupantes ou usuarios dos terreos do termo municipal beneficiarios de ditos servizos, calquera que sexa o seu título: propietarios, usufrutuarios, habitacionistas ou arrendatarios, incluso en precario.

2.- En todo caso, terá a consideración de suxeito pasivo substituto do ocupante ou usuario das

vivendas ou locais, o propietario destes inmobles, que poderá repercutir, no seu caso, as cotas satisfeitas sobre os respectivos beneficiarios do servizo.

ARTIGO 4.- RESPONSABLES

1.- Responderán solidariamente das obrigas tributarias do suxeito pasivo, as persoas físicas e xurídicas a que se refiren os artigos 38.1 e 39 da Lei xeral tributaria.

2.- Serán responsables subsidiarios os administradores das sociedades e os síndicos, interventores ou liquidadores de crebas, concursos, sociedades e entidades en xeral, nos supostos e co alcance que sinala o artigo 40 da Lei xeral tributaria.

ARTIGO 5.- COTA TRIBUTARIA

1.- A cota tributaria correspondente á concesión da licenza ou autorización de acometida á rede de sumidoiros esixirase por unha soa vez e consistirá na cantidade fixa de 14,86 euros.

2.- A cota tributaria esixirase pola prestación dos servizos da rede de sumidoiros, e a tal efecto, aplicaranse as seguintes tarifas:

VIVENDA / ESTABLECEMENTO

IMPORTE

Vivendas

3.707299 €

Establecementos de primeira categoría: lavado e engraxe de vehículos, balnearios, discotecas, pubs

8.596634 €

Establecementos de segunda categoría: salóns de peiteado, bares, tabernas, bodegóns, tinturarias,

5.673779 €

Restantes establecementos

3.707299 €

ARTIGO 6.- EXENCIONES E BONIFICACIONES

Non se concederá ningunha exención nin bonificación na exacción da presente taxa.

ARTIGO 7.- PERCEPCIÓN DA TAXA

1.- Percibirase a taxa e nace a obriga de contribuír cando se inicie a actividade municipal que constitúe o seu feito imponible, entendéndose:

a) Na data de presentación da oportuna solicitude da licenza de acometida, se o suxeito pasivo a formulase expresamente.

b) Dende que teña lugar a efectiva acometida á rede de sumidoiros municipal. A percepción por esta modalidade da taxa producírase con independencia de que se obtivera ou non a licenza de acometida e sen prexuízo do inicio do expediente administrativo que se poida instruír para a súa autorización.

2.- Os servizos de evacuación de excretas, augas pluviais, negras e residuais, e da súa depuración, teñen carácter obrigatorio para todos os predios do concello que teñan fachada ás rúas, prazas ou vías públicas nas que exista rede de sumidoiros, sempre que a distancia entre a rede e o predio non exceda de 100 metros, téndose o dereito de cobrar a taxa aínda cando os interesados non procedan a efectuar a acometida á rede.

ARTIGO 8.- DECLARACIÓN, LIQUIDACIÓN E INGRESO

1.- Os suxeitos pasivos substitutos do contribuínte formularán as declaracións de alta e baixa no censo de suxeitos pasivos da taxa no prazo que medie entre a data na que se produza a variación na titularidade do terreo e o último día do mes natural seguinte.

Estas últimas declaracións xurdirán efecto a partir da primeira liquidación que se practique unha vez finalizado o prazo de presentación de ditas declaracións de alta e baixa.

A inclusión inicial no censo farase de oficio unha vez concedida a licenza de acometida á rede.

2.- As cotas esixibles por esta taxa liquidaranse e recadaranse trimestralmente mediante recibo derivado da matrícula ou padrón.

3.- No suposto de licenza de acometida, o contribuínte formulará a oportuna solicitude, e os servizos tributarios deste concello, unha vez concedida aquela, practicarán a liquidación que proceda, que será notificada para ingreso directo na forma e prazos que sinala o Regulamento xeral de recadación.

DISPOSICIÓN DERRADEIRA

O texto da presente ordenanza fiscal substitúe e derroga o da anterior, e entrará en vigor e será de aplicación ao día seguinte da súa publicación íntegra no BOP, permanecendo en vigor até a súa modificación ou derogación expresas.

Verín, 13 de febreiro de 2018

O alcalde

Gerardo Seoane Fidalgo